



RHodolphus filius fuit Alberti comitis Habspurgēsis, qui Friderici primi castra in Asiam secutus, ad Accaron mortuus & sepultus est. & Ithæ comitissæ à Pfullendorff & Bregantia. Natus est quinto calend. Maij, anno salutis millesimo ducentesimo decimo octauo, eo die quo Bertholdus dux Zeringēsis ultimus e uiuis excessit. Hūc Fridericus secundus lustralibus undis expiatū extulit, anno regni sui sexto. Ab eo etiam post pueritiam enutritus, omnibus futuræ bonæ indolis maximā spem dedit. Erat enim moribus ingenuis, & omnis generis uirtutibus præditus. Forma præterea decora, & quadrata statura, capite nō magno, crinibus raris, naso aquilino (omnibus huius familię peculiari indice) cibi potusq; temperatissimi. Pietate etiam tanta præditus, ut rem diuinam omnibus alijs negotijs præferret. Cum autem is solam Ergouiam cum arce auita generis Habsburgi possideret, atq; reliquæ ditiones Habsburgenses patris & cognatis ipsius cederent, ac etiam ipse fratri Alberto (antequam Parmę in captiuitate moreretur) annuam pecuniam de Ergouia numerare cogeretur, fortunæ iniuria compulsus, animum ad rem militarem adiecit, ad quam natura propensus ferebatur. Sumpto itaq; auspicio à peregrinatione in terram sanctam, cui tum fere pia Germanorum nobilitas insistebat, præclara facinora ibidem edidit, ac tandem incolumis in patriam reuersus est.